

# Samþykkt um götu og torgsölu

## 1. gr. Almennt

Söluskálar og söluvagnar glæða sveitarfélagið lífi þar sem þeir standa og auka fjölbreytni í starfsemi og þjónustu í sveitarfélaginu. Samþykkt þessari er ætlað að tryggja að vel sé staðið að þessum málaflokki og að upplýsingar séu aðgengilegar og gegnsæjar fyrir áhugasama söluaðila.

Hér er um að ræða reglur vegna útgáfu leyfa fyrir götu- og torgsölu í Snæfellsbæ, sem getur verið:

- **Stöðuleyfi** sem getur gilt í allt að 7 mánuði á ári, frá apríl – til október.

Fyrir alla sölustarfsemi sem fær úthlutað stöðuleyfi í Snæfellsbæ gilda þessar reglur:

- Sölustarfsemin má ekki hamla eða trufla umferð um svæðið
- Tryggja þarf aðgengi viðbragðsaðila, s.s. lögreglu og slökkviliðs að staðnum
- Leyfishafar verða ávallt að gæta hreinlætis og sjá til þess að umhverfi sölusvæðis sé snyrtilegt og úrgangur sé flokkaður og honum fargað eins og reglur kveða á um í sveitarfélaginu
- Afla skal allra tilskilinna leyfa vegna þeirrar sölustarfsemi sem á að fara fram á staðnum og framvísa þeim með umsókn

Sölustarfsemi getur m.a. farið fram í:

- Sölubifreið þar sem afgreitt er út um söluop
- Söluvagni sem dreginn er af bifreið eða á annan hátt
- Söluskála, tjaldi eða sölubás.
- Opnu rými undir berum himni t.d. á borði undir sólhlíf, á teppi eða sambærilegu.

## 2. gr. Umsóknarferli og úthlutun

Tæknideild Snæfellsbæjar er umsjónaraðili götusölu, sölubása, söluvagna og útimarkaða og sér um framkvæmd leyfisveitinga, eftirlit og upplýsingagjöf. Umsækjandi um stöðuleyfi söluvagna getur nálgast eyðublað á vefslóðinni: <https://snb.is/stjornsysla/stjornsyslan/eydublod/>

Sækja skal um stöðuleyfi vegna götu- og torgsölu í Snæfellsbæ fyrir hvert ár.

Leyfisveitandi auglýsir, eigi síðar en **1. febrúar** ár hvert á heimasíðu Snæfellsbæjar hvenær opnað verður fyrir umsóknir um götu- og torgsöluleyfi.

Umsóknum skal skilað inn til Tæknideildar Snæfellsbæjar.

Eftir því sem að umsóknir berast frá og með tilteknum fyrirfram auglýstum degi eru þær auðkenndar með dagsetningu og tíma og móttaka staðfest.

Leyfisveiting byggir á mati á þeirri umsókn sem berst, þar sem gera á ítarlega grein fyrir fyrirhugaðri sölustarfsemi og allri umgjörð hennar; vöruframboði, þjónustu, sölutíma, staðsetningu, útliti og öllum

aðbúnaði sem starfseminni fylgir. Leitast verður við að hafa fjölbreytta starfsemi á hverjum stað. Leyfi er ekki hægt að framselja.

Með umsókn um stöðuleyfi skal fylgja samningur um sorphirðu.

Á sölusvæði er ekki gert ráð fyrir að leyfisveitandi útvegi tengingar við fráveitu, vatnsveitu, rafmagn, fjarskiptanet eða aðra innviði. Ef umsóknaraðili hyggur á að verða sér út um einhverjar slíkar tengingar skal það koma fram í umsókn með útskýringum um hvernig því verður háttað.

#### **Úthlutun byggir á þremur meginþáttum:**

- Gæðum umsóknar og þeim upplýsingum sem þar koma fram
- Kröfu um fjölbreytileika og mismunandi framboð á þjónustu
- Fyrri reynsla af rekstri umsækjenda

Leyfisveitanda er heimilt að hafna umsóknum ef hann telur að sú starfsemi sem í umsókninni felst uppfylli ekki kröfur til sölustarfsemi og/eða að starfsemin uppfylli ekki kröfur um fjölbreytileika og mismunandi framboð á þjónustu. Umsóknum án tilskilinna gagna og leyfa er hafnað.

### **3. gr. Umgengni**

#### **Eftirfarandi kröfur eru gerðar til leyfishafa:**

- Ávallt ber að gæta hreinlætis og er söluaðila skylt að sjá til þess að umhverfi sölusvæðis sé haldið hreinu. Leyfishafi skal ávallt skila sölusvæði sínu hreinu og í sama ástandi og hann tók við því.
- Mögulegar skemmdir á svæðinu verða lagfærðar af Tæknideild Snæfellsbæjar á kostnað leyfishafa. Á sölusvæði er hvorki gert ráð fyrir tengingum við fráveitu né vatnsveitu.
- Forsendur fyrir notkun á opinberum svæðum er að björgunar-/viðbragðsaðilar hafi ávallt greiðan aðgang og viðunandi starfskilyrði.

### **4. gr Útlit, aðstaða og merkingar**

- Gerð er sú krafa að útlit söluvagns/söluskála fari vel í umhverfinu, að efnisnotkun, ásýnd og yfirbragð sé vandað og við hæfi á þeim stað sem salan á að eiga sér stað.
- Öll viðföng, sorpílát, merkingar, borð og annað tilheyrandi skal tilgreina í umsókn um stöðuleyfi. Standborð við hverja sölustöð mega mest vera 0,8 m að þvermáli og skulu aldrei vera fleiri en tvö. Borð sem hægt er að sitja við skulu aldrei vera fleiri en tvö, með sæti fyrir hámark 6 á borði (ca. 2,0m x 1,2m). Að lágmarki þarf að vera eitt sorpílát við hvern söluvagn.
- Óheimilt er að setja upp hvers kyns auglýsingaskilti nema á viðkomandi söluvagni.

**5 gr.  
Gjald**

Vegna stöðuleyfa sölubása eða söluvagna er greitt stöðuleyfi samkvæmt gjaldskrá byggingarleyfisgjalda 2020 sem er 185.000 krónur og miðast við apríl til október.

**6 gr.  
Uppsögn. Lok og afturköllun leyfis**

**Eftirfarandi ákvæði gilda um uppsögn, lok og afturköllun söluleyfis:**

- Samningur getur hvenær sem er verið afturkallaður ef ákvæði samþykktar þessarar eða önnur atriði samnings hafa verið brotin, án endurgreiðslu leyfisgjalds.
- Samningur getur hvenær sem er verið afturkallaður ef áform eru um að svæðið verði notað í opinberum tilgangi, skal þá endurgreiða leyfishafa eftirstöðvar leyfisgjalds.
- Leyfishafa er gert skylt að laga sig að vega- og byggingaframkvæmdum og viðburðum á götu- og torgsölusvæðum, sem geta leitt til tímabundins flutnings og/eða afturköllunar leyfis. Leyfishafa skal tilkynnt um slíkar ráðstafanir með minnst viku fyrirvara.
- Ekki eru greiddar bætur fyrir tímabundna afturköllun á götu- og torgsöluleyfi vegna viðhalds eða annarra aðkallandi verkefna veghaldara og landeigenda á staðnum.
- Leyfishafi þarf að útlista hvernig geymsla á aðföngum verði háttað.

**7 gr.  
Aðrar reglur**

Leyfishafar skulu hlíta gildandi lögum, reglum og viðmiðum sem ná yfir starfsemina og umgjörð hennar. Í þeim tilvikum sem starfsemin krefst frekari leyfa en stöðuleyfis skal leyfisumsækjandi afla þeirra. Óleyfisstarfsemi verður tilkynnt til lögreglu.

**Bæjarstjórn Snæfellsbæjar  
6. mars 2025**